

4

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1940

T 3150/477.83

壺
關
縣

Fragment of a label or seal, partially torn and illegible.

壺關縣志卷十五

藝文

友松亭小記

楊四重

鸞山峩峩作鎮壺邑蓋余鄉柏林之西山也有松生其頂蔥鬱成林望之若烟雲縹緲故稱松峯云處於松峯之間者紫微祠也不知建自何代土人臆臘以修祀事而鄉子弟之俊秀者咸誦讀其中以廊廡爲書舍由來尚矣余總角時從家大人來習舉子業歷冬涉暑幾十載萬歷丙午大人舉於鄉以奉親依子舍所與其吾峯松者余兄和宇調鼎友人宋君文英亾兄開來及不肖

哈佛大學漢和
圖書館珍藏印

重數人而已家弟易固猶是松下問字之童子也間嘗與二三兄弟箕踞長松間讀而洒洒而叫叫而復讀伊唔聲幾與謾謾風音相答又或倚之而吟據之而瞑睇丹霞之朝榮聽清壑之鐘響其嘗不嘆此生與五大夫有緣也一日和兄顧謂余曰吾鄉先進如郭如張如吾宗科第相望雖所就不同而文章德業要皆亭亭獨上吾輩下帷攻苦將以紹述前休他日得時而駕其何以答神貺而爲諸松吐焰也余唯唯相與有盟一笑而罷歲壬子余繼大人鳴又十七年而成進士一行作吏牛馬風塵每念昔遊了不可得吏之能俗人如此今不幸

讀禮追惟往事命工庀材爲亭三楹于神之良方繚以藩垣蒔以花木寧唯宿言是踐庶幾與吾松共昕夕焉以托吾臭味云爾因名之曰友松昔楚狂士陸通常高臥松間以受霞氣而唐杜工部在流離瑣尾中每每不忘四松形之篇什不一而足蓋高人韻士其遇物別有至性匪第以其貫四時而不改柯易葉也余之名斯亭也意者其在斯乎逞吾松峯由人樵牧遂令蒼然古幹不復如桐有孫家弟輩慨然禁不得逞年來所生彌坂其大者三尺強矣倘徼神之靈未卽填溝壑猶及見皆作龍鱗也培植而呵護之不無望於後之賢者崇正丙

子秋七月記

六息亭記

楊四重

余歸政之明年與二三兄弟眺松峯而樂之尋舊好也峯頭西北有平原一區廣可坐五十許人前臨大松陰森林立無風而濤埜鳥鳴高枝其聲幽閒有天然之致俯睇人境則烟靄青蒼廬木若點憶余髫年與同志問業于此每當溽暑散髮登臨或抱膝而長吟或高枕而眠石曠然不知人世有何樂事去今三十餘年桑田滄海于焉數變而此山光景依然未免有情誰能遣此因商之諸君爲亭其上以爲棲息地僉曰可於是括友松

社中餘資不足則益余鶴糧之美築臺爲基礎以磚石四隅建礎柱以象奠鰲而以數椽覆之蓋高廣不越丈餘而河山盡收吾座中矣亭成題以六息取莊生鵬以六月息之義也諸君作而前曰夫鵬之徙南溟也水擊三千扶搖九萬而後息以六月吾子懷才未展而遽求息機不太蚤計乎余曰不然鵬之飛也負天鷄之飛也控地大小殊矣其爲知息一耳余性行薄劣處無遠志出則小草然受生之分唯此夫且不敢與斥鷃矜能而鬪捷而欲編德于大鵬之林乎飲河之腹旣滿倦飛之羽知還如是而已蓋息者止也又養生家以一呼一吸

爲之息天地間氣化相推有行必有止有往必有復譬
之人固未有有呼而無吸者也諸君笑謂息旣得聞命
矣其以六月何居余曰六陰數也陽數九主動陰數六
主靜動而與陽俱闢人之徒也靜而與陰俱翕天之徒
也且六月于卦爲遯遯者退也知進而不知退則亢而
有悔矣烏乎息抑余更有進于是者昔子產謂申屠嘉
曰我將出則子止子將出則我止今我止矣諸君獨未
可出而仕乎天下事正須我輩擔當固不得以一邱一
壑忘天下而終老也于是諸君改容太息曰富哉言乎
天道人事物理盡此矣請書諸石因記其語于此

改南關水道記

章經

凡爲民上者土木役衆快一己之私爲遊觀之所百姓
未有不咨嗟歛怨者若民事所當舉雖勞民爲重而亦
不遑恤也邑城南有水自西山奔注入惠澤池池隘非
巨浸且勢亢水溢則背城南去散折漫漶風氣不藏最
爲形家所忌但揅弊補偏人寔爲政余明令斯土周覽
旣詳亟欲改作爲壺邑久遠計猶恐民信未孚難以謀
始今紳士暨耆民等僉稱故明時南關西山水注率由
東逶迤而去當年士多顯達民頗殷富今歲久改流狂
湍逆溯士庶日就陵替前幸朱侯建準提閣鎮之究不

若導水故流之爲愈也余忻然曰人謀旣協事不可已
乃捐貲鳩工公買民地移閣於東南改水返故道從此
碧波環帶清澈旋繞自西而東有拱護之概引源合派
無迴汎之慮又中砌石橋以通往來且觀瀾濯纓自饒
佳致俯仰錦川虹彩交輝振士風而厚民俗庶兩有裨
乎因刻石紀之以垂永久

鼎建鳳山塔記

壺邑踞太行之側層巒疊嶂翠列環奇其間英賢輩出
代不乏人在昔三老四輔太師鼎甲班班可考他如諸
楊濟美二張競爽人文蔚起由來舊矣而近時則稍遜

夫山川猶是豈靈秀之氣獨萃於前而不鍾於後乎抑
運數使之也余心竊疑焉簿書之暇稽堪輿之理登陟
周覽相度形勢城之與方所稱鳳凰山者山之巔宜造
浮圖爲邑內文峯及詢薦紳父老僉言鳳山建塔寔此
邦厚幸特以厥費甚鉅慮難鼎創余念慨然一舉而有
關文風豈可漠置因獨任之亦不計其力也遂捐貲卜
日甃累肇工不閱月而告成遙瞻文筆矗峙雲表直與
夫子宮牆奎閣藜火相爲輝映焉抑余更有進者人文
賴塔之建形家之說則然矣而濟濟多士更自勵其志
不汨俗趨不競外誘潛心正學期與其鄉先生先後繼

武則人傑而地自靈又豈徒恃區區風脉之說哉

重修章公堰記

邑人馬溥
進士

章公堰者志其始也賢人君子之莅此邑其有功德於民則詠歌鼓舞假於物以示不諛甘棠之愛及所憇矣况是堰爲萬世永賴者哉蓋壺踞龍山之陽屹然起羣峯間山聳水環每夏秋其水自西北來者衆潦齊滙由城隍而東注其爲蓄洩也急矣而大河一帶自龍潭而東奔蜿蜒於此距城甚近時有汪洋震蕩之勢其爲堤防也又急矣夫固完然壺也而其東北隅偏缺豈非天造地設以待賢有司之補救耶在昔章公經之營之基

之累之石堰一城金湯永固矣後之人見章公而不得覩斯堰如見章公焉但自辛酉以來七十有餘年日剝月磨土解石裂堰之基址幾沒前任詹公甫至壺相陰陽而觀地勢利生民而奠流泉重興力役舊模復新邑甚利之奈比年來山水漲溢波臣肆虐而堰又衝決矣雖物之成敗有數其賴後此之增修者不又急耶庚午冬日我清翁宋老父臺綰綸是邑始下車卽以修舉廢墜爲已任然以他務未遑也公以山左閎闔名世魁才試烹鮮於小邑因地制宜其所以治我壺者卽以章公爲前轍章公持已以廉公之薪水不擾如之章公莅事

維勤公之案牘不留如之章公愛壺民也以仁公之恤
鰥寡賑貧乏如之章公成壺民也以義公之鋤強暴禁
宵小如之前曰召父後曰杜母其謂是哉閱期年餘政
旣成矣民旣和矣可以舉大事而不疑於衆矣乃屬其
紳衿耆庶而告之曰是堰之築於章公非偶然也不修
且無堰矣其何以壺於是慨然捐俸以倡而首事諸君
子各相勸勉慕義如響其事因大舉云是役也規則由
舊謀更圖堅卑者杵之厚其植也高者增之峻其防也
鑿深池於西隙預蓄瀦也爲水簸於東面防衝決也殿
宇而飾以丹雘崇觀瞻也亭臺而植以松柏備遊覽也

其功若浩其成較速所謂舉得其義而庶民子來者歟
自今以往斯堰不朽河順其道而震蕩不憂水歸其泉
而蓄洩得法章公之澤不益著乎雖然莫爲之前美不
彰莫爲之後盛不傳後之戴章公者皆以頌我公述之
功較重於作也則以爲章公堰可也卽以爲宋公堰亦
無不可也夫是爲記

勅建龍王廟記

邑人馮文止
進士

吾邑盤大行之曲土瘠水深民艱於汲雨雪不時降則
井泉渴竭然當崖谷幽阻之會靈秀所鍾往往有神物
棲泊於內興雲致雨每禱輒應蓋天之分奇割異不絕

於僻壤也以故居斯土者尤重龍神之祀鄉鄙報賽每廟而祠之按周禮以醯辜祭四方百物祭法曰能出雲爲風雨皆曰神龍能致雲雨爲民禦災患其祀之也宜矣粵自有唐以來池淵湫濤之祀興時以顯應疊加寵號我

國家懷柔百神增入祀典凡直省州縣有其舉之莫敢廢也况於茲邑也歟顧附郭者其典獨缺紳士合辭請於邑侯楊公公愾然曰災祥所係官此土者之職也乃因署右隙地剏龍王廟一所周垣表延又因餘貲爲旁舍如干楹洪整密緻以爲朝典慶賀之所會集凡七閱

月而告成民觀而樂之或曰禾黍之墟誅茅除穢是斷是遷乃丹乃雘可以觀治品從羣祀儀準雨師鼓鐘舞帔散酒豆籩非其類者不在祀典可以觀教或曰求民之瘼勿屯其膏飲以醴泉沃以甘露有闕其容載赫其光我侯戾止百禮具舉可以觀化且以觀事治成教立化行事舉公其亦可以不朽矣於戲亦烏知我公之所不朽乎吾邑當晉豫襟喉天設之險也用武之際遊騎之所不至蓋石起水伏難以趵泉而飲人習勞苦率有固志昔劉稹之難杜牧謂河陽至天井關距百里無井李文饒謂昭義一軍素號忠順非河北可比公於此

通地之窮因俗之宜億兆飲和百靈効順主封內之山川潤澤生民則所以留於不朽者尤必有在曾一廟之建云爾哉然而公方謙讓未遑於財則歸諸一邑士民之所樂輸於工則歸諸邑尉祝君率在城鄉約之所督理並此功而亦不有也余謂公於是役也勞不負官善不違地功不專已可謂得政本矣是不可以不記云公字榆眠江南武進人乙卯科舉人

凶中望五龍山記

邑人 牛俊

潞南巨山雄山爲最五龍次之五龍居郡之正南自郡門望之如五馬奔馳而至形家謂爲一郡之屏障誠勝

概也余開窗卽見之其山凡五支起伏屈曲雲氣往來草木蓂龍蒼翠欲滴晦明變化氣象萬千如賢主嘉賓揖讓酬酢於几案間蓋五年於此矣客歲余友蘇雲盛王六章曾携榼提壺邀余登其巔科頭披襟長歌短嘯飄飄乎有遺世之想年來奔走勞碌於塵緣俗務中邇日始靜坐齋頭推窗一視斯山宛在頓覺煩襟盡滌頃刻間驟雨如注瀟瀟可聽雨止日霽清風振林木燕子飛天半鶯啼蟬語相間雜而山容益覺可人探壺中存白酒數盞向山林飲之如立海上望方丈瀛洲不知身之在人間世也迴思客歲之遊曾幾何時雲盛已溘先

朝露而六章又羈縻於外轉增悒悶雖然朋友不必常聚也試觀之天朝則日來夜則月至何必日月共臨乃爲快乎况六章每歸省必來齋中共坐窓下各以其所領會于此山者相證而山之形態愈盡昔人所謂好山宜與故人共也山距齋十餘里予或他適窓則不啟是予有時而負此山然龍山之麓多名刹福地遊山時曾歷數處及他便道往觀者亦數處彼一邱一壑雖極幽棲之勝而山之全像竟於小囟畢見之亦快矣哉故爲記

真澤二真人廟記

邑令楊宸

真人屯留人先世家陵川商微子之後姓樂氏父山寶母楊氏感寶光而娠育繼母呂氏虐使二女嚴冬令採茹單衣跣足而二女益孝謹泣血沾土苦苴皆生血斑移家於壺之紫團山益陽里母又令拾麥無所得至羅神山曲仰天號訴倏有黃龍垂引之上昇仙樂綠空天香散路土人感其孝而得仙羣立廟祀唐僖宗時因巫降言遷葬其親於櫻桃掌維時士庶雲屯財施山積卜遷於櫻桃郊東坡鄉人酌酒於真人祈以符驗俄而旋風起於墓所取石於古任村西山有白蛇盤護其下載石時仙鹿長鳴卜地之日聞空中有悲泣聲蓋真人之

惓惓於親而默求寧順之也北宋崇寧間顯靈於邊戍大觀三年縣令李元儒禱雨立霈遂以上聞政和元年賜號冲惠冲淑元至元五年魏人郅朗宰斯邑請雨不踰夕而足蓋自唐宋以來其誠應之載諸志乘而非渺茫者如是夫守土之官爲神人主况二真人孝於親惠於民所謂立德立功與日星比烈者是烏可不亟爲表彰使人知所崇奉哉余故撮其要而重爲之記

磊菴張夫子墓誌銘

杜又密

先生諱璉字惟商別號癡翁其先溢水人始祖官於潞遂卜居壺關高祖元靜公兩任少尹曾祖登仕郎進亭

祖令教父臨山世有隱德順治己亥二月十七日而先生生焉生而聰穎頭角嶄然雙眸炯炯光如點漆太老師翁甚鍾愛之稍長從景樸先生遊卽先生之從伯父也先生旣受業勵志勤學癸亥補博士弟子員甲子卽食餼焉先生夙負豪邁之性不屑作模稜側媚態遇事敢爲遇庸鄙齷齪輩輒面叱之鄉里有不平事力爲人排解旣而翻然曰吾俠腸傲骨雖不愧古人然固宜潛修蓬養而無容狃於是也及辛未仲春遂設絳於吾家之淡園日與家世父先君子把酒論文相得甚歡後與諸先生聯謙社其爲文渾浩流轉有韓海蘇朝之觀歲

科試輒冠軍庚辰春携同人遊泰岱至曲阜登至聖之堂洎歸學益進而文日益有名壬午秋闈受知於內翰岳文江孫松坪兩先生同考官則絳邑宰楚黃盧紫潭先生也一時有賈董之目僉謂如斯人者洵不愧科名矣先是先生少孤受德於其伯父敘五公及敘五公卽世撫其子楚白教之誨之婚娶遊庠悉先生之力更可述者壬申仲冬先君子卧病且篤先生往視先君子把先生之臂諄諄以又密讀書事爲託先生慨然曰君休矣凡吾之所知者無不以教而子及又密入邑庠先生贈以詩有付託從來不可輕死生如一見交情之句鳴

呼密記斯言至今猶耿耿也先生幼失怙恃密未知其事父母者何若然見其祭先也致愛致慤思成之意見於顏面卽在學館邸舍值先人忌誕之辰亦必焚香奠醴拜跪盡哀亦可以想其生事矣先生旣登賢書仍教授生徒非公事不履公庭素不營生計祇以一經教子不欲以多財損其志困有餘粟惟釀醇醪日延知己開懷暢飲醉則長嘯高歌嗚呼此先生生平之梗槩也密得于親炙固不敢一語阿其好又其自敘云看榴關門少婦不能施其誘同舍三宿佳妓不得汗其操此先生往事也其他陰德懿行爲人不及窺者類如此所著有

留餘堂四書講義五經通鑑及諸史子輯要緣無力剞劂故未行世以康熙癸巳正月十八日卒享年五十有五植行負才而不獲顯其用士論惜之配牛孺人夙嫻內則與先生相敬如賓子昌裔邑庠增生配處士馬公萬鎰女卒繼娶郡庠生秦公格女女二一適郡學生李公嶼子誠一字處士申公洪業子二善以卒之年四月二十六日葬於盤駝村南原祖塋之次爰系之銘銘曰壺山有人厥德靡悔其文珠璣其品金壘歲在龍蛇哲人其萎赴玉樓耶抑乘箕尾其人雖逝其名不已爾熾爾昌施於孫子

杜母李孺人墓志銘

牛俊

乾隆辛巳夏杜孺人卒一時之被其惠者走哭於柩所仰其德者行嘆於道路咸以孺人爲未可死憶己卯冬孺人躬被

覃恩

之日其子若姪皆衣冠拜跪於後而姻戚稱賀奉觴上壽一時聚觀者咨嗟嘆息以爲榮且私議孺人以厚德宜邀天眷期頤之壽可操券獲不謂再踰期而孺人卽世矣宜乎不滿人願也孺人姓李氏考某妣某氏醇謹有家法孺人生而端凝幼承姆教言笑不苟動有圭臬而氣和量寬歸封公興之琴瑟調和如賓如友當翁姑

健在時孺人事之惟謹飲食供奉不以諉娣姒與娣姒共爨數十年毫無間言封公治生計嘗往來燕豫間恃孺人無內顧故能一意營運而家道遂臻饒裕厥後生齒漸繁一門之內男婦三百餘各事其事咸禀承於孺人終歲不聞一詬諍語雖析箸後亦如之當是時孺人年已老矣精神強健不倦於勤二子勸以少休孺人曰吾事不親理卽恐其悞身雖逸而心彌勞必目睹乃釋然我之所以勞其身者正所以逸其心也爾輩勿復言凡姻戚餽問之事寧數勿疏且致其豐腆間有貧不能自存者尤爲加惠里婦有所求必如其願歲祿家有婚

娶事丐者填塞街巷孺人以數金給食命一力掌之及娶曾孫婦仍如前而丐者寥寥孺人喜曰歲果豐耶何丐者之少也惟天能養人人奈何作孽干天怒耶旣膺誥封之後嘗聚子若孫而命之曰吾家以農賈起得豐于衣食皆 朝廷之賜也今又沐此 殊榮吾何德以堪之

但願爾曹砥行立名爲端人正士他日緝一綸半綬恪恭乃職是卽所以報也昔丙子歲孺人年七十有五其二子與其姪楫嘗徵文以侑觴至是已八十矣將復舉孺人不可曰福宜惜奢宜戒乃止自封公沒長子樞繼主生計每外出孺人欣然遣之是歲又當復出孺人色

悽然送至門淚涔涔下蓋慮其年高也俄染小疴樞心動卽歸卒不起屬纊時囑二子以後事甚詳以次呼男婦長幼一一敦諭之且曰吾言盡此矣事務叢生豈言所能了爾輩其善體之遂卒嗟乎生死之際惺惺不昧計周於後言適乎理雖讀書學道者猶難言之而孺人顧能若是非其天資有過人者哉孺人生於康熙二十一年五月二十三日得壽八十子男子二人曰樞曰模樞歲貢生候選訓導娶郭氏卒繼曹氏模太學生候選同知娶宋氏卒繼張氏卒又繼馬氏副室兩王氏孫男五人曰紹聖曰紹曾曰紹詩曰紹仁曰紹孔皆樞出曾

孫二曰維新曰維藩孫女一幼未字模出嗟乎孺人享旣耄之年受甘脆之養蘭桂盈堦

恩榮寵錫亦可以無憾矣以卒之年臘月望祔葬封公之壙不可以不銘銘曰

無基厚壙弗克永久惟我孺人其德孔厚克順於先克慈厥後一堂四世綏厥眉壽

褒錫煌煌懿德維彰生也何榮沒也何寧徽音可嗣尚考斯銘

重修烏泉山廣慈寺記

有序

馮士翹

長子

巔壺關東南三十五里山曰烏泉寺號廣慈名錫於有宋太平興國二年而初建實始於元魏山分太行宛轉

南來曲而少西再北突駐曲之際爲寺之座垣繞亂石
北高南下遙望樓閣殿宇參差如箕托物山門三楹左
右列金剛北而南向爲九華地藏殿西兩其步十五爲
伏魔大帝殿而東向東而少北爲天王殿北出西有殿
曰毘盧東有巍樓實下而空上上有鐘製甚古觀其古
及書跡皆唐人筆勢口徑七尺高以倍以巨木撞之聲
徹數十里樓殿之北爲當陽殿面各尺六十南向釋迦
文佛北向觀音大士北之北三階七級爲水陸殿中座
如來佛像左文殊師利像右普賢像像皆雕木而虛中
北出一武劈石爲級級三十七上爲七世諸佛殿殿之

脊與山之北巔並肩水陸殿南左右有廡東廡北上客
堂院一再東而聯南精舍院二在立壁垂藤下蒙蒙然
深且幽西廡之西南淨室院一皆寺僧所棲再西而南
而東環以石欄欄高等腰外臨絕壑壑深丈數百被松
數千盡松梢東上有池三畝旱不乾潦不溢自池而北
入寺東偏有石井深三尺窺之墨墨故曰烏泉循井畔
東登石崖繞精舍客堂七佛殿背而西有松七號曰七
星皆合抱攀松越石垣北出居巔而眺村樹若研綠長
川若鋪掌遠山若波濤自下望者自若海市化城幻變
莫測維那某僧某慮久且圯集四方布施施功自乾隆

二十七年春費日八百有奇竣事糜金錢若干以修以葺以黜以堊起山門至當陽殿罔弗新因記厥地厥時厥人于古碑之次

粵稽化城縹緲玉光騰竺國之墟幻宇參差金色照神州之域先天之先而巳有經來海變桑田後地而後不能無閱盡世沉灰劫遍八垠而著像統六合以現身寸莖化作千尋萬剎總歸一致是以法輪終古毓性四生諦妙無方感靈千界銀瓦作宮處處依舍衛之國金磚布地人人做給獨之園樓殿懸珠固輝城郭軒廊聯碧亦耀山林烏泉山廣慈寺者壺關之勝境也名錫宋宗

之世址開元氏之朝脉派行山峯居吳位超羊腸而上峙抗參井以下臨列嶂凌霄盤基跨險元藤網壑綠樹盪崖曲洞幽房杳冥於嶽岫桂廡杉楹豁廠乎寥空松風淨碧漢之塵日星常霽池水灑蒼旻之澤原野時新塏影圓空面面登臨無挂礙鐘聲入細心心夢覺破因緣且時逢獻果之猿煙移怪石每遇啣花之女颺動彩林舖晨霧於幽巖僧去偈航雲海留暮霞於絕嶠鳥歸驚舞赤城斯固鹿苑可雙鷄園有二矣有時踏靉冲雯攀藤拊葛緣蜿徑步虹蹊世宇歛超豈止丹梯十二塵寰迥出已如紫府三千坐淨域而伏魔浣腸非雨封香

城以驅毒馨骨豈花劈萬壑之蒙蒙覺劍揮于何古觀
恒沙之歷歷智珠懸在匪今籥啟丹臺朗闢雙輪之表
燈燃珠閣燭週八柱之鄉始信須彌非高天地運乎一
掌乃知曉巢豈暫古今統以含毫豈非清涼三界之奧
區銷納五行之淨土也哉但世湮代遠瓦亂魚鱗月易
歲遷椽彫翬羽青猊白象漸隳晝夜之風珠鳳丹虬半
落春秋之雨雖金身之未化已琅檻之偶消鸚鵡有情
依菩提而愾嘆鴿鴿無語棲幢蓋以興悲况謝公之屐
齒常臨惠遠之錫環久卓可熟視無覩而習聽罔聞爰
有某等質蘊山川之秀品標松柏之姿一鄉號曰先生

到處稱爲長者早服詩書不入鶴煙之市旁通典偈亦
來虎渡之溪仰畫棟之棲雲襟懷不爽瞻雕櫺之宿雨
沾滯罔銷幸而智啟山靈因之慧生法界材卽徧生此
地難望鬼斧雷施石雖不借他山豈有神工電布於是
與寺僧某等字做石苔冊編貝葉沿門募化彷彿王城
持鉢之年伏戶結緣依稀祇圃借技之日撮米可化珠
璣何待天飛玉粒寸絲亦成貝錦不須月落金錢白馬
呈材黃牛効駕班師施準墨子引繩砌甃綴爨泥和龍
天之雨雕楹刻桷斤揮颶海之風洩珠網於星津瑀櫺
鶴翥吐瑤璫於月徑綉桷虬伸彩漾輕霞光含薄霧綠

房黛護紫閣青疏鰲背指而九地不搖媧皇補而三天
無漏爾乃大闢神光華嚴布於瓊宇宏開覺路妙麗發
乎金龕鵬翅之中粧點千尋幻相象牙之表鼓吹八部
真音九瓔七寶之宮垂天畢現四相三乘之路拔地俱
呈此固師子龍孫之會共轉梵帝金輪亦由優婆闍比
之皈成成法王寶闕焉耳斯時殿閣起於空中樓臺寄
乎象外雲環霧繞高擁芙蓉之城月朗星輝旁懸蛟蜃
之市掌上之珠光百八烘日月而同明毫間之金彩萬
千照都城而並麗樹樹結成甘露香浸羣生峰峰化作
慈螺影庇庶類山禽載喜譜婆羅月殿之歌林鹿騰歡

垂星觀天魔之舞慧性洽乎犬股靈根寄以豕牙無顯
不微有空皆實雖超超而在上乃隱隱而皆通是以闕
號流霞因之宮同明月天童居守海聖彌縫應百古而
常今宜一新之罔舊然而抱犢仙跡石室久傳鳳篆紫
團妙諦洞天長載龍文况閬苑天開高廻車之峯以岌
岌亦鷺巒地接並曬金之石而同同若字缺娜嬛或詞
微琳珞則山花笑其少色而岸草嘆其孤芳矣於是六
七比丘二三居士旁求翠琰遠播鴻微螭首鈎銀龜文
琢玉毫濡滄海之波蛟鯨蟠筆策展青雲之跡鸞鶴舞
牋抒思切利之天縱目無生之境心泉湧而不竭性鎖

闢而愈寬實大覺之助華馥飛林麓豈寸靈之生彩光
印瑱珉

佩德記

錢國璽

余昔披輿圖潞澤形勝實居天下之脊以太行一山綿
亘而聳峙也雖不能至心嚮往之夫山之高而深者其
人必敦以厚山之遠而曲者其人必曠以遠山之麗而
秀者其人必儁以逸太行之間有王屋焉有林慮焉有
紫團焉始兼備諸勝槩也自當篤生瑰異鬱爲名儒若
得班荆而遇其人誠一快事及謁選得上黨之壺關因
而交學博常先生夙昔登山訪高賢之志爲之大慰

先生澤之高平人以丙戌高魁振鐸茲邑士之晉而謁
者弗束修是詢而詢學業娓娓無倦容昔荀齋頭春風
四被矣月有課甲之乙之故士知研窮理奧砥礪行誼
學宮日就頽圯率庠之好義者經之營之廟貌巋然規
制改觀矣曾署長治庠篆模模范范亦如模范壺庠者
不忍曰鬢序一壇而遽廬眎之也余於簿書之暇得與
先生縱談經濟窺先生之學誠有如記所云大叩則大
鳴小叩則小鳴豈易窺其蘊藉哉乃知梗楠之材厥根
孔固湖泮之勢厥源孔深先生蓋有自來矣大父存仁
公以進士備兵榆林父衍祚公以明經佐理姑蘇兩世

功績至今爛焉先生備九載政績上諸銓部銓部註上
 考多士正慮先生之遷而去也會朝廷更制改度縣之
 大者曰教諭孝廉任之縣之小者曰訓導明經任之壺
 關小邑也例當改選先生雖未遷而已去也多士不能
 日奉大雅之誨僉謀伐石以志不忘逮余室而請記之
 余安能記哉雖然師之道得胡瑗而尊得陽城而親師
 而尊焉容忘師而親焉容忘先生且兼之矣多士之思
 良師與余之思良友不同誼而同情余又安能不記哉
 但嘉言懿行未易罄述先生之不朽者寧藉此太行一
 片石已耶先生名在號祺斗

壺關縣志卷十六

藝文

玉峽關銘

明夏言

玉峽關者夏子剏焉而命之名也舊曰風門口在隆
 慮萬山之巔為兩河三晉之界蓋天作之險也前此
 弗設守庸氓徃徃憑阻以拒命吏廼卽是關焉關成
 而繫之以銘

太行盤盤橫厲中原近引河朔遙綴崑崙太原大梁維
 國雄藩壺關林慮界於花園鳥道崎仄輪摧馬煩怪石
 離列熊攀豹蹲連崖壁立屹如墉垣絕頂中斷是曰風

門俛臨夜壑仰逼朝暎一夫挺身萬騎空屯設險甚固
王者道存廼告守吏爰作鍵閤勒銘巖阿寵以瑤琨匪
險在德用戒嚚昏

苦寒行

時來圍壺關
故經羊腸坂

魏武帝

北上太行山艱哉何崔巍羊腸坂詰屈車輪爲之摧樹
木何蕭瑟北風聲正悲熊羆對我蹲虎豹夾路啼谿谷
少人民雪落何霏霏延頸長歎息遠行多所懷我心何
怫鬱思欲一東歸水深橋梁絕中路正徘徊迷惑失故
路薄暮無宿棲行行日已遠人馬同時饑擔囊行取薪
斧冰持作糜悲彼東山詩悠悠使我哀

賜崔日知往潞州

唐元宗

潞國開新府壺關寵舊林妙旌循吏德持悅庶氓心禮
樂中朝貴神明列郡欽揚風非贈扇易俗是張琴藩鎮
謳謠滿行宮雨露深會書丞相策先賜潁川金
按詩所
云壺關
不必卽今治
姑列於此

奉和聖製早登太行山中言志

唐苗晉卿

金吾戒道清羽騎動天聲砥路當南絕重巖始北征關
樓前望遠河邑下觀平喜氣迴輿合祥風轉旆輕祝堯
三老至會禹百神迎月令農先急春蒐禮後行仍親后
土祭更理晉陽兵不似勞車轍空留八駿名

遊靈顯觀

唐呂岩

素衣邱壑寄生涯相近茅衡共幾家
卧聽松音臨水石坐看山色老烟霞
林中有鶴窺來客岩畔無人見落花
但把琴書消白晝不須爐裏煉丹砂

壺關道中作

唐韋莊

處處兵戈路不通却從山北去江東
黃昏欲到壺關寨匹馬寒嘶野草中

題紫團山三十六景

宋王家

迎暘峯

陽燧初升八極車飛光猶帶赤城霞
山英固有葵心在

不許羣峯取次遮

倚秀峯

山形疊疊掩禪關長薄蕭森落照間
天女欲誇新結束都將翠藻簇煙鬟

天杠

不分蒼梧西北傾只將一柱與撐撐
而今六幕安然處應教斯人樂太平

磨崖

家山本與語溪接使節曾過砥柱遊
見說紫團銘勒處西風千里重回頭

濯纓溪

江上老人終獨往塵中孺子果何知溪翁欲識滄浪意
看取青霄浸月時

東華表

借問遼東鶴歸來得許悲浮生隨念變何待塚纍纍

西華表

寄謝西朝相神奸古有圖如何延客處庭燎照豐狐

碧蘿峯

風曳山妃帶雲穿木客衣青松容嫋嫋紅葉半飛飛月
為幽人罷春從舊處歸明朝碧峯外試與絆斜暉

金屋山

雲拂層峯四面朝朝陽北過更岵金仙自合居金屋
不為膠東貯阿嬌

鳴尾山

天借溪山奠佛居全將帝所作規模漢家不識真鳴尾
何笑區區問越巫

山翁崖

仙翁愛山居留形在東嶺風林度嘯聲雲壑漾飛影華
髮欲蕭蕭青瞳猶耿耿追踪有名流回首發深省

駐雲亭

塵迹初從世網收一邱一壑此優游却應化作飛雲片
長向亭前伴客留

老人峯

江廬已別游河侶商洛休陪謁漢賓獨立南山千嶂裏
長將萬壽祝嚴宸

南極園

清徽有逸仙疇昔下南極紫氣遠成圖照此太白域芝
田手所耘地靈亦知嗇雲根一十八劬掘安可得惟餘
亂峯間喬林竦寒色

紫團勝賞聞之舊矣壺關大夫俾圖作讚欲得予詩

時在管城錦繡潭上自食至晡已賦三十六景因以
草卷寄之時政和六年秋九月既望乙巳輔道書郡
志曰輔道書字神奇原刻十二石亦以搨本累僧碎
之埋於山麓後人踪跡掘之止得八石砌之慈雲寺
壁間後止存四石順治十八年知縣朱輔移置學宮

寶崑僧舍

宗道

寂寂鐘魚相滿軒午風輕颺煮茶烟西堂竟日無人到
只許山人借榻眠

北極山

連綦

撐破白雲積翠環孤峯遙倚北辰間黎川歷歷憑高望

幾點村煙落照間

和

江受益

奇峯翠嶺出雲霄更比終南太華高
萬壑烟霞深有意向人招隱莫徒勞

紫團山

明 潘憲王

紫蓋雲霞合青天石壁開禪僧坐溪畔
幽鳥下山隈地有長生藥門多隔歲苔
鳴鐘天向夕清響半空來

應召上京

杜 敷

符使星馳到華門草茅何者敢踰垣
鞠躬出拜王言辱策杖來朝上位尊
輦御六龍登黼座樓棲雙鳳叫天聞

方今復覩勲華盛蕩蕩巍巍至道存

題紫團山二仙廟

梅之尹

山到紫團高萬丈半空樓閣二仙祠
天臺劉阮非今世湘浦皇英望九疑
旭日窓櫺青瑣闥晴嵐簷瓦翠琉璃
鄉民盡說格天孝香火能供不斷時

寄壺關縣丞郭柏

杜 敷

獨員縣丞才三月雷厲風飛見設施
日夕花封猶聽政月明松院正哦詩
康莊當展龍媒足枳棘非棲鸞鳳枝
卓魯到今千載遠料應德教有光輝

送致道先生詩

三首并引鈔一

申 甫

聘君南坡致道先生朝京潞郡大夫庭芳李先生
士龍郭公歌詩以華其行甫南坡筆硯友也詎容
緘默勉裁三詩布鼓雷門實自慚耳

其一曰南坡

南坡老明經鬢髮如雪智囊深無底眼孔大如月樂
天安土卧東山義胆忠肝凜如鐵芝香薇嫩蕨芽肥及
時自釀松醪酌衣裁荷芰佩紉蘭枕石漱流尚高節富
貴惡能滌威武安能折丈夫真是天下奇襟懷玉鑑冰
壺潔亂世保身脫網羅克剛克柔克明哲治朝符使天
上來翻然應聘朝京闕京闕遙遙一千里騎鯨遠涉吳

江水吳江滔滔浪泊天一着神鞭上鶉尾叩閭闔瞻天
顏敷奏萬言策字字鏘琅玕行道濟時素志酬周公夢
復非邯鄲黃袍虛席久矣望子爲稷契豈止爲謝安

送致道杜先生應召赴京

張 肅

人生應有觀光日公去金陵八月時秋色一江揚子渡
天香萬里桂花枝草堂事業知工部御史風流說牧之
自古冶城登眺地好詩相寄莫相違

喜雨篇送杜致道先生

有引

梅之尹

時亢旱喜雨鬢舍舉酒餞別因作詩贈焉同會者
有吳興呂侯士安三山郭公永齡幕賓絳陽馮遵

道稅使觀津李思敬邑庠生王進城曹九齡館下
諸生馬文淵輩二十人俱書壁間以記歲月云耳
去年五月禱卽雨今年七月猶虔虔行香三日乃小雨
五日甘澍始沛然不才愧攝百里政民命實係蒼蒼天
君恩有詔甚優厚天下大復秋租全雨暘時若又豐稔
康衢擊壤雍熙年吳興呂侯有善政餘波流澤無後先
三山郭公興利永兩池水滿歡聲傳邑中官曹與學校
彬彬人物俱時賢太行杜公近被召恩波萬頃天池邊
非熊之兆後車載白頭拾遺黃麻宣朝廷鳩杖作圖畫
讜論獻納近御筵泮宮諸生此餞別賦詩因贈喜雨篇

受官

杜 敷

應聘叨聯宰輔班九重宮闕幸躋攀時論風化巖廊上
日近天顏咫尺間紫禁進趨冠岌岌青宮步履佩珊珊
人臣補報心渾赤方得稱爲不素餐

紫團山

二絕
鈔一

磴道崎嶇雲作梯登峯環抱古招提何時得解黃塵鞅
卜築紫團深處栖

題杜四輔

劉欽順

前山傷稿木昭代聞人出一戰勝河東獨步廣寒宮飛
龍瞻淮甸夜夜夢豹變山樊入天使大人時利見黃幄

則爲臣青宮則爲友魚水歡莫旣素絲梳滿手

中書省與吳伯宗唱和

郭 翀

鳳凰城闕紫霄間歷數丕承王氣還舊說圖書符洛邑
載瞻玉帛會塗山太平有象耕桑盛邊奏無聞甲冑閒
自古英才躋盛美願歌天保達龍顏

聞壺關寇平侍臣勦功寄贈

李夢陽

岵堯上黨接壺關仗鉞東行歷萬山巖凍雪堆擒虎窟
壑腥雲斲斫龍灣漸巉巉路透魚樵入蒼蔚林清鳥雀還
爲問登高能賦者霜毫幾掃白雲閒

紫團八景 有序

張 鐸

紫團三十六景宋政和中王宗字輔道者應邑大夫
之請者也詩刻半存得景二十有二伊昔象形命名
意各攸寓人代寥闊兵燹薦經詞客幽人遊賞罕繼
今諸峯雖羅列而名號湮沒殘碑所遺亦漫無可指
遂使名嶽兒孫懵焉失傳予慕昔賢之高致憐真景
之娛人參彼詩義符此近稱取其尤彰著者列爲八
景摛詞勒之聊以當博奕云爾

橋樓淙

淙去聲卽輔道
之仙翁崖也

徑轉橋樓出騶嘶猿鶴驚捫蘿防磴滑拄杖看雲生仙
去樓空閉橋深淙自清臨風操綠綺山水獨含情

雲蓋寺

即駐雲亭也

下馬禮空王逍遙步法堂
名山雄晉魏紺宇自隋唐
雲擁諸天濕風生六月涼
閻仙當日事踪跡已微茫

將軍峯

即東西二華表也

招提依絕壁門拱二將軍
受職鎮靈境荷戈凌紫氛
威名千古著梵宇半空聞
仰止欽高躅徘徊散夕曛

照壁山

即屏墻山也

真僧已入定羣動欲開顏
天啟如來鑰門扃照壁山
翻經忘色相說法掩禪關
蒼翠空相對巉巖不可攀

倚秀峯

乃照壁前山最高而秀者
輔道所著今名無稱焉

屏墻相對峙突兀見高峯
玉女新粧出山巒翠岱濃
雲霄橫綺縠河漢插芙蓉
不費尋幽力塵寰那得逢

濯纓溪

輔道所著名

小溪分瀑布素練靜無聲
到此謝塵鞅因之濯冕纓
名因孺子重水得聖人清
剩有觀瀾興憐君欲結盟

參園

即南極園昔有傳服參飛仙者本草亦品紫團參為上今園已墾而田矣

瑞草象人形名園倚畫屏
百年仙跡迴此日法輪停
市藥僧常繫巡山戶盡局
貪婪訴小吏哀怨若為聽

磨崖碑

舊名與今同

懸崖鏤古籀拂石辨蟲魚
壁立人難近光瑩玉不如僧

能問奇字佛亦護名書讀罷迷心悟山靈若啟予

佛耳摩雲二首

百道飛泉遶翠微四圍丹嶂映禪扉時看鬪雀汗經案
似解真僧已息機

狹徑前村人去獨長空斜日鳥飛雙憑軒一幅春山畫
漫學丹青寫北牕

前題

五言律二首鈔一

勝槩分黎國崇岡俯柏林到來天逼近坐久氣蕭森白
日生靈籟青雲接地陰塵機何日息從此聽禪音

前題

茅坤

插漢如來境相參高木林壑深雲出沒堂邃氣蕭森恠
石生蒼蘚疎松轉綠陰曉來堪聽處梵語雜禽音

前題

楊漑

禪開絕壁迥清幽洗鉢焚香任客留岫吐白雲濃澹出
溪停碧玉淺深流松吟絲竹偏宜夏地遠炎蒸剩有秋
聞說尋真還遯世何如結宇此山頭

前題

楊湘

路隔紅塵俗眼稀閑雲幽鳥總忘機山僧鎮日無他事
獨坐松陰補衲衣

前題

張鎮

捫蘿直上費躋攀暫憇禪宮心自閑出岫雲歸明月夜
棲松鶴去紫團山

前題

朱雲鳳

佛耳高插天掩冉雲滿谷遊人玩奇變昕夕看不足迎
風翠蓋翻映日錦屏矗曉摩霞影紅晚盪黛光綠卷舒
總無心悠然潤林麓蒼生渴霖雨遲爾生百穀

北極靈跡二首

陳霆
德清人

峯迴松風長危蹬出蘿蔦上有紫皇殿碧瓦耀青昊帝
尊儼廟坐祝史嚴汜掃風雲擁輿衛日月照龍藻達人
慕真境遺世歎不早何當置短鋪住此種瑤草

三晉古雄國歷世多異人偉茲壺山賢開國推文臣微
時掇神笏塑偶起欠伸登龍首臚唱氣壓三千羣誰云
貌不揚便腹皆經綸何時拜遺像千載瞻風塵

前題

劉麟

翩翩玉堂子迢迢湖水濱睠彼取笏者結屋乃比隣大
君昔造命况復聖且神郭公會其逢易置如轉輪於何
幽冥中默定良以勤永懷世上事夢卜真何人

遊紫團山

孔廕
金陵人

武夷山下紫團開曾見元朝司馬來濃淡山粧西子貌
淺深波浸梵王臺鹿啣芝草歸僧院鶯蹴桃花落酒杯

風景似非人世界却疑竟夢到天臺

過壺關 二絕 鈔一

壺關三月氣蕭森滿地風塵接暮陰行過溪橋問春色
數株松栢對孤岑

翠微仙洞

顧應祥

樂家二女此登仙留得芳名百世傳豈有靈丹能蛻骨
祇因純孝自通天雲輶鶴駕秋空遠澗草溪毛歲事虔
欲向翠微問消息歸來華表是何年

佛耳山

劉麟

佛有骨亦有齒世賢不用輕相訾晉嶺蟠空天下無擇

勝呈聰露其耳當養性悞養身宛轉形容尙孤峙佛今
已入無何有化作青峯常住此聞人附語或厭凡侵肌
烈烈長風起入寺烹茶烟火生僧伽半道人羣是何時
幻質復西來共開清聽探元始

縣居詩

六首 有序

牛恒

予未第時閱姚武功縣居詩心竊慕之嘉靖丁酉
冬來知壺林山幽道僻頗多暇日每有感遇輒興
吟詠率用其韻積若干首因題曰縣居詩亦效顰

意云 鈔四

武屋終南下別來跡漸疎自知山縣印羞見故人書蕙

壺關縣志 卷一 藝文
三
帳空驚鶴苔磯想釣魚終朝刀筆裏何處覓元虛
龍溪遙獻翠壺口舊開關三老已云去今人茲未閑幽
崖花自發落日鳥空還樂氏二仙女飄飄出世間
涼風生嶺下秋思與誰論松菊荒三徑漁樵自一村思
親時望遠卧病暫關門何時從微宦久違庭下言
驅驅臨遠陌父老出村迎一見識淳俗十年不入城禾
麻連遇雹兒女盡吞聲重愧余爲令民艱早未明

送紫團山人歸山山人能詩每夢與李白遊

王雲鳳

紫團山湧千尋碧處處雲霞老松柏澗底春逢石乳垂

洞中時見仙翁奕君能遊之不憚遠夢中談者彷彿李
姓而名白仰攀日月明俯瞰天地窄樂莫樂兮茲一遊
至今瞻眺情無極君停雕鞍我歌紫團柳線垂隄綠桃
花映水丹我歌紫團君停雕鞍君歸兮浩浩我愁兮漫
漫望紫團兮曾不咫尺太行崔嵬兮羊腸艱仙翁袖有
餐霞編欲往從之是何年安得與君跨雨鶴山頭長誦
逍遙篇此行若見謫仙語謫仙授子以仙譜果然假寐
夢青連恍如握手傳仙訣春鴈來時寄我書莫待長安
飄素雪

登寶巖寺觀金燈

崔士燦

太行千里亘地軸隆慮西來羣峯矗嶺下梵宮開
景相端嚴擬天竺玲瓏亂垂如倒蓮石龕空洞似華屋
棟宇追琢皆文章千佛萬佛駭人目神工運巧如巨靈
泉水涓涓繞佛足昔聞清夜現神燈半信半疑心未服
花朝携友一登臨詩囊酒榼隨童僕曉行紅日上高岑
俯瞰白雲滿空谷行行杖屨近青霄寥寥塵寰真一掬
半山雨落濕樵薪山上朝暎凝樹絲來來徃徃人攀躋
香火朝神相陸續轆轤千尺下瓊漿岩底行人消吻酷
洞垂佛手浴清冷頂偃古松蒼蓋覆平生癖性愛煙霞
天下奇觀可稱獨夕陽對酌發高歌近夜看燈試密祝

忽然對山一星明清輝晃晃如行燭須臾數點起四山
眼底澗中五燈簇乍明乍暗焰熒熒還遠還近光煜煜
分明出現摩尼珠龍女呈來照林麓遊人大咤號佛聲
果是山靈酌我欲僧人邀我坐禪林手捧清茶奏梵曲
細問此山開何時住持誰者留芳躅云昔修定芋上人
石窟端居虎自伏示寂一性返靈山百年遺骨香如玉
寶塔幽堂卧儼然過客咨嗟盡瞻肅聖境須生聖者成
梵天魏峩表亭毒聞言不覺豎顛毛胸中愁須消萬斛
禪宗我悟最上乘覩此佛靈莫敢瀆同行俱是青雲流
紀勝教予書東牘西山奇蹟滿襟懷歸家可作卧遊錄

小窓一枕醉春風清夢夷猶伴猿鹿

同賈廉父遊紫團山

七首萬歷甲辰秋鈔三

周一梧

長治人

二仙祠

一水千山轉琳宮天際開仙娥冲舉地香水歲時來洞口留丹竈峯頭餘鳳臺知君有遐想臨去更徘徊

白雲寺

時遇雨

鷲嶺轉三車深林景足嘉禪林無外戶僧飯有胡麻一雨消塵障連朝落寶花慈悲如愛客故遣白雲遮

雲蓋寺

白馬來從天竺西寰中勝地盡招提閬仙曾借禪關隱

雲蓋因留蘭若題落日荒山迷草徑連天絕巘擁虹梯雄文古刹消殘劫忍聽愁猿半夜啼

紫團山峭拔翠聳俯瞰雲烟中間瀑布流泉霞城洞府求之海內不可多得而諸刹又創自隋唐當重佛從文之世宜詩文摩刻無少遜於少林諸勝境乃宮殿皆委於兵燹而雲蓋又先為崩崖所壓僅得磨崖一碑至慈林有輔道三十六詩而已亡其十四舟車不通人跡罕至居人鮮探奇攬勝之士是以作者既湮述者未接地主乏九方之識而山靈負鹽車之泣矣使此山移之長安吳會則闡

揚點綴操管城而紀靈異者將汗牛充棟豈至寥
寥若此哉撫景增歎總賦一律而返

薄遊尋勝跡窮探入幽深斷碣蟲書缺孤碑草色侵泉
聲喧急澗陰雨蔽秋林惆悵隨歸雁空懷吊古心

題風穴

郭恬

古祠王嶺下一穴自虛中獨擅吹噓力因知神妙功時
聞疑沸水秋至若鳴蟲造化有奇秘探之渺未窮

約遊紫團山

達人謝塵鞅誓將名山遊况乃紫團麓競傳風景幽懸
崖藏古寺瀑布瀉寒流何日松雲下得陪杖屨遊

登栲栳山

西南壺邑鎮栲栳有名山虎踞真形勝仙壇亦壯觀吾
儕此眺望終日共躋攀觴詠情何極煙光夕未還

遊紫團慈雲寺

郭忻

深雲幽寺隱山隈古栢青松蔭石臺草據參園仙女去
雲遮龍洞暗泉來風生幽鳥穿林出雨過閒花對酒開
世事浮名何用絆此身今夕到蓬萊

送人還壺關

明周

林花未吐怯輕寒人在天涯送客還千里好山迎馬首
白雲飛處是壺關

友松亭

楊四易

呼童挈壺榼來酌松峯亭嬉笑對良友待月臨前庭野
曠天氣高白露淒以零回念平生權短髮已星星酒闌
醉扶歸昏昏不能醒

題寶岩寺

國朝程之珫

花園村踞太行巔上有古刹栖枯禪入夜金燈往往出
乍明乍滅樹林邊觀燈佛子歸佛力自我思之恐不然
中土無佛山卽有此燈燦爛幾千年非從白馬馱來物
不稽之語莫輕傳暇日偶看草木子謂燈皆是山靈宣
明珠一顆能潤浦良玉一片能輝田寶藏之與萃陵谷

自然光怪冲雲天峨嵋簡州衡嶽地匡廬天章太白前
到處有燈驚耳目豈皆天竺種奇緣鄴下崔生名下士
流連詠物題詩篇才華俊逸但佞佛佛日豈借燈增妍
我作此言告來者讀書明理莫牽纏山歸山兮佛歸佛
鑑朗衡平兩不偏

遊紫團山

朱輔

紫團如蓋鎖山隈石磴層層曲徑開萬木蕭森環古寺
一潭澄徹曳青苔昇仙妹子餐霞邈攬勝遊人躡屐來
只此徜徉堪永歲不須園裏問參苓

玉峽

牛倬

上黨崔嵬甚羊腸鬼斧開路從雲裡出人白日邊來
宿寶巖寺

巖間清夢醒牕外白雲飛世事渾忘却鐘聲入翠微
送馬令琰赴任壺關

汪由敦

綰綬臨關右隻鳧送闕前地爲天下脊人擬鄴中仙舊
俗仍唐魏新猷在誦絃勉旃民社重莫謾詡烹鮮

烏泉寺

章經邑令

曲嶂轉幽徑盤迴入長松殿角懸雲漢樹杪度疎鐘寺
以泉得名山半流淙淙我欲極大觀飛攀佛耳峯遙睇
西山紫層雲徐盪冒暮歸成短歌因之紀游踪

題澹寧堂壁

結廬數椽傍城陰古木蕭疎映碧岑疑在中條巖屋下
悠然一片白雲心

河交道中

山迴路不窮驅馬行將夕遠邨入烟霞返照翻山脊
予歷層巔去天不盈尺下際臨深澗削壁如列戟迤邐
盡岸屈其境較坦適間以蒼蒼樹繚以纍纍石巖花不
知名或黃亦或白何由謝塵鞅長此著遊屐

登昇仙臺

憑虛直上最高峯天半臺懸雲影重鶴馭九霄勞悵望

萬山暮靄動疎鐘

福巖寺

長嘯招提境公餘躡屐游白雲孤寺晚紅葉亂山秋幢
影無風動經壇有月留塵機能頓悟身世復何求

登抱犢山同諸子各賦

携尊登抱犢遠眺且停盃野草爭先發林花獨晚開青
霞懸峭壁細雨過荒臺欲覓泉源處遙從山底回

登抱犢山

周 驥 慈谿人

石室容登眺千峯覆酒杯孤城春色晚荒寺夕陽開鷄
犬通村徑烟蘿護玉臺當年稽叔夜空問素書回

春日登壺關城作

壺關城古太行連南望春遲憶杜鵑蕭寺半懸青嶂外
烟村多住綠楊邊上書三老家何處抱犢仙人姓不傳
猶說頻年經戰伐棠梨開遍草芊芊

福巖寺

蒼涼關塞迥野寺白雲通積雪孤城外空山夕照中磬
聲歸洞壑塔影亂飛鴻垂老耽禪悅圍爐話遠公

集飲章公堰

壽恒成 暨陽人

新障沙堤水遶城遠山晴翠入波明雨餘夾岸烟光合
雲度中央練影生贖可銜盃同適意何妨作賦各言情

地靈早識流應滙爭頌賢侯百世名

登栲栳山

馬溥

栲栳山顛倚翠微凭欄長嘯對晴暉疎鐘疑向雲中落
野鶴時從寺外飛近接太行平頂看俯拖沾水當腰圍
興來掃石長跌坐月滿岩阿未肯歸

紫團山雜吟

李之華 滄曲人

雲蒸近午渴思茶偃蓋虬松當路斜恠得風來香襲袂

滿岩開遍紫蘭花

松下小憇

昇仙臺上憶仙姝縹緲雲旗擬步虛坐月吹簫風露冷

紫霄何日賁鸞書

昇仙臺

百尺蒼崖鉄立堅銀鈎玉箸舊流傳我來空自增惆悵

滿壁苔花綴綠錢

摩崖碑

古洞雲封晝亦沉探奇直欲竟幽深鱗行蠖屈隨周折

別有壺天物外心

紫團古洞

登龍溪山

牛俊

家在龍溪山下住時來龍溪山上遊龍溪山上可遠眺
高閣危檻凭清秋秋風凌空陣陣起鴈字斜飛白雲裏
臨風把酒一放歌名利紛紛奈我何

賦得邑中靜無事

王華浙

喜見邑中靜恬然一事無質常安飲食閒豈迫追呼鷄

大干村樂桑麻百里紆公庭誰復擾雀角不相誣明月
琴堂照清風花縣敷神君饒德化傳誦遍吾壺

佛耳摩雲

邑人 李天植

西來法相自氤氳幻作青山護紫雲猶剩不生不滅耳
用摩乍捲乍舒雲當年梵語臨牕聽此日松濤隔岸聞
一朵挿天峯咋嶂羊腸細折路斜分

北山雪霽

碎鋪玉屑漫高峯失却巉巖翠幾重紅耀赤城霞已散
白明瑤島雪猶封烘晴烟擁孤村樹帶冷風飄野寺鐘
試啟軒窓聊北望別開生面盪心胸

紫團山

馬士桂

紫氣團團繞太空危峯壁立鬱葱葱石壇縹緲雲藏日
琪樹蕭疎雨帶風百丈飛泉濺曲徑一輪明月掛仙宮
擬登絕頂爲舒眼三晉河山指顧中

濯纓溪

千古爭傳孺子歌紫團山下泛微波纖塵不動蒼苔淨
一色無痕白練拖此日濯纓緣忽淨當年洗耳意如何
晚來更覺清輝溢明月娟娟掛薜蘿

翠微洞

翠微深處遠紅塵能得胡麻有幾人仙跡沉沉青嶂在

洞門隱隱白雲屯風生榻外松何古雨洒竈旁草自春
讀罷殘碑思往事靈風疑下玉京賓

杜四輔祠堂

馮士翹長子人

昔聞壺關四輔名今來展拜思先生老從黃屋依龍袞
終卧紫團課鶴經皆蘚空臨遺像古松風猶憶曳笳輕
可憐當日諸名將誰向秋泉嘯月明

佛耳山

秀拔東南獨此峯晴開扶步向遙空高卑天地平分裡
遠近山川一氣中細草常依雲外露幽葩不入世間風
樓傳十二何方見呼吸遙遙帝座通

摩雲寺

鹿苑岩堯橫碧空白雲生處闢梵宮畫龍壁蝕三春雨
鉄馬塔搏午夜風僧去烟霞仍檻外鳥歸苔石自山中
從來靜境誰常住谷口幽泉嶺上松

鳳山徐真人祠

壺天深處碧嶙峋傳道仙家煉藥頻栢染竈烟千古翠
花含丹氣四時春嶺頭雲駐疑銀鶴石上露棲想玉賓
獨立高峯空悵望一川浮靄上松榛

柄

按諸詩有仍舊志者有新爲采輯者苟非失之
庸猥則必列焉凡以一邑之山川風景人物旣已

壺關縣志卷十七
形之詠謔曷忍輕棄但苦見聞有限深山廢碣老
屋長吟安在無傑製也搜羅之遍固以待後之有
事於斯者矣

壺關縣志卷十七

藝文補遺

明邑令奈西田去思碑文

楊承勛

嵐縣
教諭

壺關古黎地也按一統志曰士質民愚風醇俗古然地
僻而事繁土瘠而賦重故司牧是邑者亦未易堪其
任耳隆慶元年關西奈公來宰此土生之以仁惠之心
溥之以公物之治率清直之性撫凋瘵之民律已以廉
莅官以敬御史也嚴接士也恭胥役無下鄉之擾田野
興樂土之謠審編法善催科政拙及時招撫流移動以
千計誠所謂冰蘖映心陽和鋪地者也其他如學校之

作興壇廟之修飾甃敵臺以堅城墉蒔樹木以蔭濠隍
實心實政種種在人口碑傳頌匪出阿私陟東城兵馬
指揮使啟行之日士民遮送不忍遽釋雖攀轅留鳥未
足以伸借寇留苗之思矣公諱邦奇字鍾秀號西田陝
西鳳翔縣人已酉鄉進士云

題名碑記

張鐸

關中徐侯來令吾邑四閱歲興廢之餘以縣缺題名詣
予請曰邑有志則沿革徵名有題則氏里著弗徵弗著
令之責也今將伐木礱石次第舉行希以題名記先焉
予曰壺古黎國也建治殆數千載歷世滋遠司牧者無

所于稽矣惟是我皇明繼天立極百九十餘年設官宰
邑燦如列宿但題名久廢創始者勞侯之聲實年資旦
夕又當遷陟乃今日披往牒咨故老屬情曠典推是心
也足以仁吾民矣何也名者實之賓也往者來之鑑也
繼自今循名責實將曰某也良某也虐某也誠某也僞
豐碑在左常日顧諟因賓以求主因鑑以索照警慕益
切而勸懲彌昭凡崇愛厚生道利剔蠱以爲吾民者當
無往不用其情嗚呼可以興矣曩予自翰林代匱三原
嘗題名于茲石者也承侯之請惕然增畏不敢飾浮辭
以負委重漫著其實如右云

張時髦舉河南儒學提舉劄付

行中書省陝西等處平章政事兼同知河南行樞密院事嘗謂維持風化固學校之當先儀範人才尤師儒之是重况武事方殷之日正文風漸弛之時苟不選賢曷以資治切見壺關縣尹張時髦天資篤厚學問真純筆陣縱橫千人之軍獨掃詞源浩瀚三峽之水倒流確乎君子卓爾俊髦將本官舉充河南儒學副提舉匪惟作養其賢才誠足裨益于治道爲此除已咨定中書省照詳外仰照驗依到任施行

楊惟謙墓志

陳

音莆田人

君諱能字惟謙先世自太原徙壺關之栢林少有遠志不屑事家人產業補邑庠弟子員志銳學優天順己卯年二十六領鄉薦自是三上春官皆不偶成化辛卯銓試第一拜湖廣武昌府同知守制服闕改授山東東昌府同知公明斷列郡有疑獄難事輒專檄委付皆刻期事集且愜輿論濮州民董憲等以妖言觸罪召事連無辜十餘人皆抵死累歲稱冤無敢原釋者君獨爲平反未減家各象君祀之歷九載闔郡兵民交疏顛請遂陞本府知府東昌當兩京遠道舊例設夫廩役民助貢獻漕輓歲久滋弊民旣罷力復索錢以供厚餽名曰順流

錢貴宦道經一體需給吏胥資緣爲奸民不堪命君下令頓革成化癸卯山東歲大稔募民輸粟賑饑者予冠帶東昌民願輸者復索民賑充邊儲君力請于藩以民前所輸者代賑民皆手額稱慶自是屢有年君立倉勸民積粟備荒凡得粟六餘萬斛君凡所敷政惟欲爲民造福上司或有厲民者君揚言抗論頌聲雖溢于里巷毀言益騰于京都時子奇已登王華榜進士聞謗馳書勸君少徇時避禍君貽書切責之曰吾素以直道教汝而汝乃若是豈善遵庭訓者其自持益力竟用是見擠于當道謫雲南徵江府通判抵任諏民隱新政令踰歲嬰病劇遂以弘治己酉五月六日卒君之宦業詳山東通志予爲撮其畧以志其墓云

郭宗周墓表

張鐸

公諱份字宗周號紫團山人含光柔嘉秉性敦篤見素抱樸智巧無所用其謀知雄守雌躁妄不能滑其慮神棲靜專之域行在金玉之間爰自弱冠早策名于晉闈泊乎入銓遂領符于霸郡貞固幹事鈎鉅未遑平易近民威稜罔耀霸盜藪又涉區也于時賣劍買牛林垆鮮潢池之警菖耕杏耨閭閻興樂土之謠刑未濫乎一人澤誕敷于二載嗚呼習俗相沿而難移所尙既定而不

變監司或不覈惠愛之實守令遂止以簿書爲能公也敦大德以和民烹小鮮而爲政循良可績上下允孚柰之何世薄老成俗欽猥利執坦夷以自信竟緯繆而難容宅憂而往邸報緣萋菲而共成讀禮有聞家居恒容與而自得杜門謝客長日惟左右琴書掃徑延賓有時或徜徉碁局年踰六表不失赤子之心官居五品惟存儒素之舊政使期頤享壽厚重鎮浮不爲邑俗之助善人之慶乎天不憖遺以嘉靖戊申四月二十三日卒用表其墓以旌碩德

楊綦夫墓表

龔用卿

君諱森字綦夫幼而英茂知學舉止異常兒及壯補邑庠弟子員輒默默于人下志于進取乃援例入太學意欲有所事者期滿登銓曹授四川廣元簿改直隸鹽山縣鹽山縣地多蕪民困于凶荒相誘爲盜出沒不常所至皆殘破君掩捕有方分散其黨鹽城賴以保全邑人有李姓者以被誣罪至死獄成欲救釋以百金潛餽于君君心知其寃也却而不受而獄賴以平歲甲戌陞陝西肅州衛知事不喜于逢迎奔走遂謝事歸優游山林雅好歌咏邑行鄉飲酒禮與席者或有不類禮請數四而君獨不往伯兄奇任浙江叅政君事之盡其恭敬赴

銓日聞訃不遠千里走哭之蘊瑜懷奇雖不偶于科第而恒出其素蘊者以教其子孫情者督之以嚴惑者折之以理扞格疑似者咸豁如也文士遊學自遠來者必延致之嘉靖壬午長子河順天鄉薦次子洛本省鄉薦皆蔚有聲譽能世厥家可以知楊氏之有人而其施未艾也以嘉靖六年三月二十一日卒遺言戒子弟以喪事毋過奢墓志毋溢美此其見亦可謂高也已

楊東之墓志

郭 鋈

君諱河字東之別號素庵幼而天資穎異器宇沉靜弘治乙卯應省試大爲督學所賞蔚有時名學士薦紳之

識君者謂簪組可速化也顧偃蹇場屋者殆二十年乃以家學淑其諸弟正德丙子己卯兩科俱擬君中式以小嫌爲有司所抑卒以貢入成均歲壬午登順天周禪榜名在高等一時雅望翕然歸之無何丁繼母憂尋接父喪哀毀幾絕士論賢之自是家居讀禮課子弟者又數年壬辰服闋赴銓得膚施尹膚爲烏延附郭路衝民疲比歲不登君勤撫字緩催科屢以年饑請于憲臣得減賦稅之半由是逋租匿役歸誠自出丙申調滎陽下車卽飾學宮課生儒優禮士大夫政務寬厚榮俗素恥長吏謂君長者無他術可貨取也有縣民徐姓者以孽

子選賓藩府俱事露人教之懷金爲餽君厲色叱之正法一惡少妄請于縣尉云某地有金若干某私識其處尉信之匿其人于公所者旬日乘閒以請于君君諭以守官御下之道不宜輕信小利重傷大體尉慚又月餘尉竟以此報上官乃發丁掘金卒無所得當道之素易君者轉敬服嘆羨以爲不可及君寥廓之志貞潔之操韜晦之行多此類相君素履福祉未可涯也胡乃淪于一尹不獲壽以享爲善之利天之報施善人爲何如哉

楊汝中墓志

牛 恒

公諱洛字汝中號立軒天性孝友岐嶷秀發嘉靖壬午以易領鄉薦是秋兄河亦薦北畿時父官肅州公思太夫人弗逮祿養嗚咽謝賀者衆爲改容比上春官屢弗第嘉靖壬辰就銓宰山東單縣樹利祛弊崇儉禁靡遊宦有周恩單文彪者物故捐俸殯殮遺賻其家邑濱黃河因策備患數條請諸上官單人稱利君宿負氣節耻事趨謁弗愜當道意改官陝之渭源翁穉追送有泣下者抵渭行李蕭然幾不周道里費邑在西鄙習尙薄悍公論以先孝弟植禮讓時教諭員缺按部者聞公學行傳檄兼理士習丕變有渭川八政之詠其興水利彌虎患爲最著當道以才優地陋首列薦剡邑久做創理過

勞又聞兄河卒于滎陽君哀毀逾節感嘔血疾視醫蘭州作歌自况遺書戒子于後事甚詳遂弗起渭邑人士如哭私親後陞慶陽府通判命下而公已不祿矣

張邦靖墓志

趙時春

君諱鎮字邦靖翰林鐸之兄也幼學卽馳聲鄉曲以遠大自期弱冠中省試游成均友天下名士益肆力于學博極羣書所著詩文稿甚富十上不偶士論惜之君性直而操嚴行敏而言訥道義充然有古人風平生屈禮寒士藐說大人有一介不取之節無不可對人之言弟鐸敷歷仕途掘符內外君避嫌遠跡惟恐干謁之及僑

寓泊頭杜門自課達官輿皂及廬權詞避之入議其偏而士服其高使其俯就官守其持廉秉公力行古道必有大過人者而乃皓首窮經一命不沾悲夫

郭汝學墓志

孔天衍

壺有龍石君諱恂字汝學太平里人父修以例授三品武職君五歲就學日記千餘言十九舉辛卯鄉試魁多士刻文五篇主司批其文曰疏通爾雅館閣之裁經世華國之章也及見君少年益驚歎焉後會試八次不偶人爲君屈君守道不携視屈信泊如也初三品公被誣成獄君青衿抱恨曰使吾父生子不如緹縈哉及中式

叩首謝天曰是忤理父寃之日也于是極力陳救十年損其家資之半父不得寃出獄時已年老目盲而君亦面顰髮脫矣君子曰孝哉使龍石如陶朱公兒不貲存而父亡乎已未當入試以中寒不果行而三品公適考終正寢君力疾悲號水漿不入口遂感脅痛氣鬱不起矣邑侯何君吊曰天不憖遺使孝子淪棄里中傷悼皆枚淚失聲以爲孝子可贖人百其身也君稟清淑之氣純孝友之心溫恭愷悌端雅惠和至于涵睿照于冲虛蓄英華于簡澹若固而有介石之貞如懦而有不倚之操則進于道遠矣兵憲汪北津與君舊數欲邀致館中不得其介如此文藝外性喜作字遂擅臨池之工又喜陰陽地理星命之學言命則屢中常自算午運當厄屆期果以四十八歲卒嗚乎以君之學行而數亦圍之天其難問也已

郭汝靜墓志

路王道

君諱恬字汝靜別號壺山晚年慕薛文清之學于太極圖通書西銘未嘗釋手潛心有得乃撰無庵吟父份弘治甲子鄉薦授霸州守君生而丰姿俊整器宇端凝十三齡入庠十六廩食肄業河汾書院每試輒冠多士丁酉果雋秋闈會試下第因趨省霸州未幾銓授充府推

官究號噐劇難理君摧豪伸寃明慎用刑多所平反如稽覈侵漁審編驛徭代守署篆惠威覃被嘗手書廳壁有不爲利屈而爲義出之句其平恕概可識矣撫按交章薦剡郡守特加敬重甲子入簾識拔名士曲阜聖裔爲旁宗所誣勘者率摸稜不敢直君廉情平反尋以剛腸疾惡爲人所忌乘間有媒孽者于是談咲丐休瀟然還里放情邱壑日與上黨耆舊結社陶情嘗語兒輩曰吾自束髮迄今講學之功未始少輟吾之燕貽其在斯乎處家庭臨妻孥嚴翼不苟祠堂歲祀惟謹惇信重義睦族和隣耻同流俗媵阿之態或有不平直言剖析而

胷次無少芥蒂家有餘貲推惠周急不償亦不之校邑令扁其門曰德壽並茂蓋稱情云辛未夏無疾危坐而逝非素養孰能然乎有詩文若干卷藏于家享年八十有二

楊文田墓志

張慎言

公之先諱能者以良二千石顯大叅公諱奇其子森又其孫河暨其仲洛同登賢書後先項背相望悉列臚仕公以世閥華胄乃察其僕從居處蕭然如田舍翁公後先文安平山悉赤縣文安去白溝河三十里爲九河下流霸伯且用爲壑公經營指畫酷暑赫曦躬先畚鍤庶

民子來堤不致潰鄭國召信臣之烈爛焉徭役之累曰
守陵曰牧曰解率温室受役三年徧五百戶有奇餐壁
爲政不則豪有力居其間公綜覈而哀益之先爲簿正
人人厭其意吏不得因緣爲奸利遼左之警旣悉索敝
賦供億無逋負征繕儲備順流與之更始吏習而民安
之繭絲保障屹如也當事者用循蹟啟事後先積三章
無何邑倖遽中盜直指循故事以聞持其章曰循令也
奈何公令無然願爲法受過邑父老板轅軹道父老挾
緡扳輿資廉府君薪水尋補平山仍取文安之治輕重
布之廉里猾舞法付城旦有得地中錢千緡者豪傑攘

之不可得首而請公沒諸官公曰田者自得之他何與
焉行格伯長法免濱河之逋租昔柳論蒙治京兆河南
一人而寬嚴異張復之治蜀一人一地而寬嚴異公平
山文安之治蓋亦各有攸當也逆璫祠將徧海內檄且
至公力持不可忤胥意見諸聲色公遂投牒去兩邑口
碑膾炙循例隨牒冀得當用公毅然拂衣恬介方幅終
身以之嗚乎迹其所設措雖古之循吏何以加期伸其
志節而不戀夫名位抑又非人所可及也已公諱夢龍
字文田別號見吾

楊會一墓表

周再勳

公文田平山公之子匏齋侍御公之弟也生甫十月而失特稍長庭訓甚嚴授麟經於侍御公十七補邑庠弟子員以冠軍餼於庠數奇戰屢北甲申國變備罹闖賊之毒

皇清定鼎網羅俊傑公以

恩貢應選授陝西城固縣知縣比時聲教甫及人心觀望危疑兼以漢山七盤等二十餘砦畔民特險梗化公推誠勸諭投戈歸附者數千家地方漸獲寧宅邑又有堰務鑿山引泉出洩俱有成例灌溉維均自師旅因仍而野無稼穡加以沮洳之所湮塞豪強之所兼併成例已

不可問公清理疏通計田限時分水溉田瘠土故爲沃壤於是剡薦交章擢江南松江府同知鯨鯢出沒之鄉蓋海防重地也公自筮仕以來所遇者皆極難之時所處者皆極難之事心血枯於飛輓精神疲於簿書會秋風起蓴鱸興思凡七請告歸始得致政公其急流勇退者哉歸田杜門却掃屏絕人事手一編不釋或圍碁賦詩樂其天年而已初侍御公敷歷中外家政悉付托於公前後同爨者六十餘年始終無間朴質儉素絕無世宦貴介氣其待侍御二子婚娶教訓不啻所生日吾以報吾兄拊循教育之恩也平生所著有靜齋文稿槃阿

心詠諸集病將革呼子豪前日學宮根本之地聽其傾
圯吾不能忘情汝其免爲之豪受命捐鍰鼎新宮墻成
公志也公諱四易字會一別號靜齋

楊侍御墓志

弟四易撰

侍御諱四重字凝一號匏齋生而骨相奇偉精神端審
目所流覽輒記七歲受胡氏春秋而十三經史漢諸編
無不披尋博通年十二應童子試冠曹偶年二十六登
賢能書戊辰成進士令宜陽宜處嵩嶽麓民頑梗逋賦
歲缺額二萬金前令目爲坑塹公下車登進父老子弟
于庭勸誡樂輸仍禁火耗清中飽興學造士崇墉浚隍

務穡勸農凡有益于民者無不修舉不數月而宜大治
以能勝劇移洛陽洛爲福王封國且當川湖諸孔道網
密而事繁令疲于奔命而薦紳巨室法尼不行公事士
大夫以禮馭吏以法撫小民以慈惠夙興夜寐邑無廢
事福藩以神宗愛子其下人虎而冠諸中貴怙寵負氣
道路以目公以禮諭之甚者則以法繩之相戒無犯而
禮其有行誼者俾有所矜式流寇窺渡自沔口闌入兵
使張皇無措邑丞馬密授公指傳致羅織公愀然曰殺
人媚人甘斧鑕不爲一官烏足惜百計平反司李湯公
大喜曰使燕都無霜齊地有雨者洛令功也五載上計

故事資俸深者留選清華時賊渡河台省合疏中州入
覲者宜留辦寇上報可公明斥堠嚴圍閣戰守互施剿
撫並用民受其賜已奉璽書徵召行次偃師聞繼母變
徒跣旋里葬祭悉如禮服除甫入都忽心動而先君子
溘先朝露矣蒼頭來公搶地呼天一痛幾絕匍匐奔歸
日夕樞側肥甘不入口踰歲不處內日取家禮跽讀治
木營葬一遵先正內外嫺黨交稱公孝子禫除赴部拜
南江西道御史時南臺乏員公受事而視中東南三城
秣陵五方湊集無賴子充斥轂下公下令緩良戢奸夙
夜匪懈錢法大壞勅官鼓鑄官商朋比爲姦利官爐私

鑄遞相侵漁輕重錯雜低假相攙名曰爐黃錢錢無定
質物因無定價市肆閔然喇棍朱大舉等乘機打搶根
本重地幾成鼎沸公單騎緝拏立獲首惡六名具疏上
聞奉旨正法人心始定搯江中丞某公苟且玩愒置江
防度外公憤然曰南宋粗安持此天塹耳誰實司之疎
忽至此抗疏指叅上赫震怒語具南臺疏草中至所建
白省煩擾緩征繕諸便宜賜嘉納焉崇禎末季闖逆圍
汴闕七載兩河告急之檄雨下公昏晝江干緝奸防變
而張猷忠通天星等數復盤據豫章三楚間眈眈虎視
虎帥左良玉父子跋扈舉足動搖公廉實薄暮艤舟巡

警申飭更移書開諭東南半壁恃以無恐矣拮据六年甫獲得代報命入廣陵卽聞逆闖據關中信由開歸過鄴時山左河北悉爲闖有道路梗塞微服抵里家已先爲僞師劉宗亮等搶掠殆盡矣

國朝以原官徵用奉差督漕催回空禁帶貨條上諸要務不一而足晝夜攢運飛輓鱗次糧數溢額課最待擢而同官倉使以盜情劾運弁某某者則公報竣入剡章者也令甲漕運問完久倉儲問耗蠹功過原不相掩有求貨而代爲之解者公憤曰吾以賄免是再受叅也竟擬削職拂衣去日偕諸兄弟戚友笑傲山阿投壺歌飲不

半歲而病卒嗚呼難罄所蘊未竟其施其可慨息也已

柄按自張君時髦以下皆邑之望也舊志列其名載各墓志墓表之畧以見其生平事實旣無此體例而楊君輯志從通志所載亦畧而不賅今搜得其授官劄及墓志墓表等類列之藝文庶其人之生平可攷其詳也已

題江村漁樂圖卷

杜 敷

一葉之舟其爲屋也悠悠曾不葺修百尾之鱗其爲糧也陳陳曾不固困是爲葛天無懷氏之民有客倚杖而歌之曰採春江之毛兮彼茁者蒲捕秋江之魚兮彼肥

者鱸左琴與書右樽與壺貧歎富歎寵歎辱歎夫何知歎

謝友送菊

清曉秋香入夢魂短僮携菊到衡門金英采采沾衣袖
翠樹低低可瓦盆欲療枯腸供一嚼且從案上寄孤根
等閑不使西風笑猶餘對花酒滿樽

客裏中秋懷友

客遇中秋嘆我生眼空節物坐茅亭老天萬古此明月
故友幾人如曉星南北連天猶戰伐衣冠何地不凋零
呼僮旋貰西隣酒拚却今宵醉不醒

杖

齒豁眉龐氣血衰常扶五尺瘦筇枝世途賴而無傾跌
心地於予不險危鄉飲每陪先出禮殿班嘗預早朝儀
歸山惟愛跣趺坐何復携君有所之

贈卜者張雲溪

雲溪老人八秩翁髮如老子顏如童身世浮雲薄四海
胷懷列宿森九宮坎離顛倒煉金鼎象數推演敲銅鐘
君平貨卜勸忠孝百錢閉肆名無窮

贈道士

閉口懶言天下事讀書求見古人顏龍祥道士無人識

欲煉長生九轉丹猿鶴曉參風霞冷松筠晚對水雲閑
釀成白酒春生醉讀罷黃庭月滿壇愧我尋真猶未得
空留名姓在人間

上郭丞鑿池

混沌既開闢清濁乃奠位水居五行始生成一六配其
氣升乎天其質行乎地流者以爲坎止者以爲兌險則
陷不測說則通且濟既云爲至足此邑何難致引泉無
津源掘井極深昧汲挹苦長綆瓶罌恨虛器夫何免渴
飢是宜惜沐類偉哉賢大丞憂民形寢寐爲鑿方圓池
修治絕汗穢至誠感必通甘澍忽滂沛水潦注以盈泓

澄清乃匯月浸波光平風皺水紋細汲之意隨足取者
力爲易遠近旣通潤上下盡惠利農民歌諸野商賈忻
於市誰如公之仁亦見公之智澤期施無涯謳頌名弗
墜

輯詩畢有眎柄拙菴全集者鈔如干首附焉不敢

遺珠也

詩餘

問心軒好事近

周 驥

碧柳叫黃鸝玉砌朱櫻紅葯山縣放衙時早無意隨琴
鶴口告天夜半靜焚香露浥緋衣薄消受壺中日月許

航飛河朔

前題

朝玉階

初晴雀噪牡丹天春城含翠黛一庭烟曲池雙燕舞翩
翩輕風吹柳浪落榆錢□醉翁亭上雪堂邊勞心多少
事恤民艱荒村犬吠趨花眠依稀忘晉魏住桃源

題亦隱齋壁

錦堂春

壽恒成

芳徑尋花緩步畫欄聽鳥嬌啼耕雲釣月他年事切莫
預尋思□且對眼前好境還看石上留題朝飛仙鳥青
雲處退食自委蛇

夜集問心軒劇飲同九逸諸子填詞

醉花陰

鄭瑞南

繡簾寶篆香初透花霧籠雕牖宓丁正調絃皓月清風
對影雙携袖呼僮命酒薰金獸趨蟾光如畫一飲百
千杯看劍檢書再把南華讀

詩餘數首從舊志附焉亦以備藝文一體也

壺關縣志卷十八

遺事

河東曹季友當漢宣帝時採藥犢山於岩穴中得金箱九都龍真經記乃武帝時河東太守張純所上者以示侍臣云武帝嘗玩讀遺命隨入梓宮不知何以至此典經郎中曰此經乃太陰鍊形之術得之上元夫人夫殉葬而出真異事也世傳武帝解羽化理或然與

府志

鍾元常初與關杞學書抱犢山師曹喜劉得昇後得韋誕塚所藏書遂過於師無以為比

通志

王烈與稽叔夜友善烈登抱犢山入一石室見素書兩卷讀之莫識其字不敢取但暗記數十字以示叔夜叔夜盡識之因與同往不得石室處又嘗上太行山聞山裂如雷響視之石裂中有青泥流出如髓丸之隨凝如粳米乃合數丸歸示叔夜已成青石矣亦與同往山合如故烈私語弟子曰叔夜未合得道故也

府志

魏真君中內學者奏言上黨有天子氣云在壺關大王山武帝於是南巡以厭當之累石爲三斬其北鳳凰山以毀其形後齊神武寔居上黨坊及就食山東舍

大王山六旬而行

苗晉卿困於名場一年似得復落第春景暄妍策蹇驢出都門貰酒一壺藉草而坐醺醉而寐久之旣覺有老父坐其旁因揖敘以餘杯飲老父愧謝曰郎君縈悒恥寧要知前事耶苗曰某應舉已久有一第分乎曰大有事但更問苗曰某困於窮變一郡寧可及乎曰更向上曰廉察乎曰更向上苗公乘酒猛問曰將相乎曰更向上苗公怒全不信困肆言曰將相上作天子乎老父曰天子真者卽不得假者卽得苗都以爲怪誕揖之而去後果爲將相及德宗昇遐攝冢宰

三日

幽閒鼓吹

張延賞夫人苗氏父晉卿宰相翁嘉貞宰相夫延賞以節度使拜相子宏靖宰相壻韋臯以宰相兼西川節度自古婦人之貴無如張夫人者

後梁開平二年使其將李思安攻潞州營於壺關伐木爲柵破一大木木中朱書文六子曰天十四載石遲思安表上之其羣臣皆賀以爲十四年必有遠夷貢稱寶者其司天少監徐鴻獨謂其所親曰遲右無之字爲犀號者上天符命豈缺文乎吾以爲丙申之歲當有石氏王此地者移四字中兩豎畫置天字左右

卽丙字也移四字外圈以十貫之卽申字也後至丙

申歲晉高祖以石姓起并州如鴻之言

稽神錄

壺關栢林西山有古比極祠幽僻人不敢夜入郭翀未第時與友人賈敏李素約取神笏二友先令人潛神座後恐喝翀其人忽聽神云郭狀元借笏翀至取笏見神立授之後翀開科臚唱第一及登殿太祖從燭影下見其眇曰真榜眼因易第二名人猶稱郭狀元

辯證

抱犢山據五朝志云在壺關潞安府志云爲陵川縣所割而林縣志又云在大頭山之西卽林慮之橋嶺抱

犢固也名四十五福地按大頭山在魯班門西北魯班門卽虹梯關舊屬壺關夫林縣在紫團山之東陵川在紫團山之南中隔紫團山壺關縣境各不相涉爭引之俱爲未確余以爲紫團山秀絕人區何以漢唐以來絕無遊賞以此言之則宋以後之紫團或卽唐以前之抱犢也特土人名之曰紫團抱犢之名遂隱耳聊發疑竇以俟耽山水者審之

羊腸坂據戰國策史記前漢書地理志魏武帝詩劉長卿詩俱在上黨惟隋書煬帝據皇甫士安地書云在太原北九十里後世學者因不細攷而不知太原北

乃羊腸山而非羊腸坂也史記趙世家蘇厲遺趙王書云秦以三郡攻王之上黨羊腸之西魏武帝詩云北上太行山艱哉何崔巍羊腸坂屈曲車輪爲之摧時帝北征將拔壺關時作也若以羊腸在太原之北則自太行山至太原中隔霍山安能相達又劉長卿太行苦熱行云朝辭羊腸坂夕望具邱郭漳水斜遶營常山遙入幕夫清漳濁漳皆發源於上黨與太原風馬牛不相及按圖考籍未可淆也

苗氏諸賢韓昌黎稱苗賁皇之後遂家壺關唐書苗晉卿傳亦云壺關而世系表獨云長子有苗襲夔夫襲

夔未嘗仕宦有功業何以獨著豈傳係宋祁撰表係歐陽公撰故互異耶抑別有所據耶苗如蘭表云王府謔議參軍而昌黎云仕至太子司議郎汝州司馬表有苗收而傳無其人通志載苗台符天祐三年進士而韓臨邛云大中八年表有廷乂而韓作廷苗時中據宋史列傳其先自壺關徙宿州則爲宿州人矣通志直云壺關人則似時中始徙宿州者固未可據而舊志摘入僑寓亦無此體例也姑摘所疑以俟知者

王天利舊志及府志皆云明代今考警宵亭碑記則云大元國天歷三年歲次庚午春三月壬子朔龍溪東埜僅菴陰陽教授王天利記則其爲元人而非明人可知矣

崔珩舊志作壺關人歲貢任絳縣教諭姜逆破城死節府志有歲貢崔珩任絳州學正而不云死節通志則云絳縣舉人任壺關教諭姜逆之亂死節壺志則無教諭崔珩而通志亦無別見恐舊志誤於傳聞抑省志筆誤耶事關忠孝不敢輒刪故兩存以俟考正

